

DISSERTATIO INAUGURALIS  
SISTENS  
**HYDROPEM**  
**ALIIS MORBIS SVC-**  
**CEDENTEM,**

QVAM  
DIVINI NUMINIS GRATIA  
ADSPIRANTE  
CONSENSV ET INDVLTV  
GRATIOSISSIMÆ  
FACULTATIS MEDICÆ  
IN  
INCLYTA ARGENTORATENSIVM VNIVERSITATE  
PRO  
SVMMIS IN ARTE MEDICA HONORIBVS ET PRIVI-  
LEGIIS DOCTORALIBVS IMPETRANDIS  
SOLENNI ERVDITORVM DISQVISIONI  
SVBJICIET

**IOHANNES GOERITZ,**  
Ratisbonensis.

ad diem xxii. Mens. Novembr. M DCC XXXII.

H. L. Q. C.



ARGENTORATI,  
TYPIS JOHANNIS HEINRICI HEITZII.

Digitized by the Internet Archive  
in 2019 with funding from  
Wellcome Library

<https://archive.org/details/b30778281>



AVGVSTÆ ac LIBERÆ  
*SACRI ROMANI IMPERII REIPVBLICÆ*  
RATISBONENSIS  
**INCLYTO ORDINI  
SENATORIO,**

VIRIS

ILLVSTRI DIGNITATE ET AVCTORITATE  
MAGNIFICIS, PERSTRENVIS, PRÆNOBILISSIMIS,  
AMPLISSIMIS, PRVDENTISSIMIS,  
GRAVISSIMIS,

**DN. DN. CAMERARIO  
CONSVLARIBVS**

ET

**SENATORIBVS**

RELIQVIS,

**PATRIAE PATRIBVS  
OPTIME MERITIS,**

DOMINIS MAECENATIBV

A C

PATRONIS SVMMIS

SVBMISSO OBSEQVIO

ET

*PERPETVO PIETATIS CVLTV DE-  
VENERANDIS,*

THESES HASCE INAVGVRALES

IN GRATISSIMI ET OBSERVANTISSIMI ANIMI  
TESSERAM EO, QVO PAR EST, MODO

D. D. D.

ILLVSTRIVM VESTRORVM  
NOMINVM

Devotissimus Cultor

JOHANNES GOERITZ

Ratisbonensis.





## P R O O E M I U M.



Quantum in Pathologicis usum habeat doctrina de metaschematismo, aut proteiformi morbi unius in alium mutatione, seu, qua ratione affectus non modo se invicem concomitantur, sed & mutuo sese consequuntur, experientia quotidiana testatur. Id quod quam maxime è causæ morbificæ ab una parte in aliam, nempe ab internis ad externas, à nobilioribus ad ignobiliores & vicissim ab his ad illas patet metastasi. Differt vero hæc interse ratione materiæ, qua vel sanguis, vel serum aut lympa, vel alius humor ad certa loca propellitur; sive loci, si quando pro ætatum differentia nunc ad caput, nunc ad pectus, nunc ad abdomen decubitus fit; sive temporis, dum modo in morbi initio, modo circa dies criticos & salutari naturæ conamine, modo vero morbo jam superato contingit; sive motus, cujus



intuitu prompte, repentino successu & sensibilibiter, sæpius tacite magis, multo cum tempore & se-  
gnius fieri assolet; sive modi agendi, quo perfecta  
est & plena, aut imperfecta, completa aut incom-  
pleta, activa vel passiva. Quæ metastases in fe-  
bribus exanthematicis & rheumatico-arthriticis  
affectibus quam maxime observantur.

Hunc autem metaschematismum, quo morbos  
ex aliis pullulare toto die videmus, vel principii vi-  
talis actioni & intentioni; vel morbi naturæ & essen-  
tiæ; vel subjecti conditioni & temperamento; vel  
malo ægrotantis regimini; vel denique perversæ me-  
dicationi adscribendum esse censeo. Cujus confi-  
deratio, cum non exiguæ in Praxi Clinica utilitatis  
sit, de hoc morborum successu & transmutatione  
non tam generatim, quam potius de aliquorum  
speciatim in hydropem, Speciminis Inauguralis loco,  
pauca quædam commentari, ac Eruditorum Cen-  
suræ subjicere mecum constitui. In quo schedias-  
mate, si B. L. plurima deprehenderit, quæ minus  
recte posita Ipsi videntur, in memoriam sibi revocet  
enixe rogo, tyronem experientia & sufficienti ob-  
servatione destitui. Faxit Supremum Numen, ut  
omnia in sui Nominis gloriam, ægrotorumque sa-  
lutem vergant.

*B. C. D.*





B. C. D.

§. I.



**A**ntequam hydropis definitionem aggrediar, pauca quædam præmonenda mihi veniunt, nempe quod in hujus thematis elaboratione de illa hydropis specie, quæ Ascites appellatur, agere mecum constituerim. Cum vero instituti ratio paucula quædam de hydrope in genere proferre postulet, ea paucis verbis Lectoris judicio exponere conatus sum. Definitio itaque hydropem in genere, quod sit p. n. feri collectio & stagnatio, vel in toto corporis habitu, vel in certa tantum cavitate, vel in una solum, aut pluribus simul partibus facta, ex qua stagnatione notabilis tumor pallidus, frigidus &, prout in aliqua parte est, pressus sui vestigia relinquens oritur.

§. II.

Ex qua in medium prolata definitione quilibet facile colligere potest, plurimas hydropis enumerari posse species. Nonnunquam enim partium externarum pori & interstitia fibrillarum, seu potius substantia cellulosa, sub



cute latens fero, quod tumorem vel universalem, vel particularem in pedibus aut scroto efficit, expleantur, quod malum & priscis Medicis anasarcae, leucophlegmatiae, Recentioribus aquae intercutis nomine insignire placuit; quandoque etiam lymphæ in cavitationem majorem extravasata & elasticitate majore prædita in flatum resolvitur & sic majorem abdominis cavo distensionem infert, ita ut, si digito tangatur, sonum edat. Quod malum tympanitem nominatum legimus. Porro considerandus mihi venit Ascites, in quo aquam, qua abdomen intumescit, intra peritonæum ejusque lamellam cellulosam coacervatam observamus. Minime vero excludendæ sunt reliquæ partes & cavitates; omnes enim, quæ glandulis & vasis lymphaticis gaudent, laborare etiam possunt hydrope particulari. Sic datur hydrops thoracis, mesenterii, ovarii muliebris, tubæ Fallopiæ, uteri; quandoque etiam aquæ in peritonæi vulgo stabilita duplicatura hærentes cernuntur; quandoque inter peritonæum & musculos abdominis simul aqua coacervatur; quandoque etiam sacco peculiari inclusas aquas invenimus, unde nomen hydropis saccati venit. Nec scroti tumor vel hydrocele prætereundus est, nec hydrops lacteus omittendus, nec etiam hydrops vesicularis & glandularis vilipendendus est, & quæ sunt reliqua, quibus omnibus recensendis non immorabor. Si quis vero plura de his legere desideret, evolvat STALP. VANDER WIEL. *Cent. 2. Obs. 28.* PISON. *de morbo à seros. colluv. oriund. Sect. 4. c. 3.* MART. LISTER & SYDENH. *de hydrop.* PELARG. *Colleg. Pract.* SENNERT. *Prax. L. 3. P. 6. S. 2. C. 3.* HIST. ACAD. REG. SCIENT. 1701, 1702, 1703. RUYSCH. *Observ. 27. & 46* BOGDAN. *Observ. 10.* FRANCK DE FRANCKEN. *de diaped. restit.* Bressl. *Natur. Gesch. Tent. 19. p. 187. seqq. Tent. 23. p. 77.*

§. III.

Ego autem me ad illam hydropis speciem, nempe Ascitem verto, utpote in qua tractanda per totam dissertationem

tatio-



tationem potissimum occupatus ero. Quæ vox Græcis suos debet natales & ab ἀπὸ τῆ ἀσκῆ, Latinis utris nomine venientis derivatur, quia in cavitate abdominis, velut in utre aqua continetur, quæ intra peritonæum coacervata abdomen intumescere facit. Est hic affectus Ascites inter reliqua hydropis genera periculosissimus, & si multum invaluit, curatu difficillimus pronuntiatur. Materia vero hunc hydropem constituens non ex arteriis aut venis sanguiferis, quin potius lymphaticis, maxime è glandulis & vasis lymphaticis propriè dictis effunditur. Interim vero est tumor p. n. ab aquosi, serosi, imo & lymphatici humoris collectione ortus & cum partium sanguinem & lympham depurantium & elaborantium vitio conjunctus.

§. IV.

Et hæc pauca illa sunt, quæ de hydrope in genere afferre animus fuit. Par itaque est, ut ipsum thema, quod in hac dissertatione pertractare consultum duximus, ulteriori disquisitioni subjiciamus. Priusquam autem id ipsum suscipimus, generaliora quædam, ex quibus rationem thematicis quivis perspicere valet, in apricum deducamus. Sole enim meridiano clarius est, hydropem Ascitem multis aliis supervenire morbis, imprimis iis, qui vel chronici sunt, vel ex se & sua natura ad obstructions proni eo re ipsa tendunt, v. g. Febris quartana, quæ si non rite tractatur, ita quidem, ut materia viscida, in visceribus hypochondriacis hærens, non evacuetur vid. JUNKER. in *Consp. Med. Theor. Pract.* Tab. 80. in scirrhusitates atque obstructions hepatis, lienis glandularumque mesaraicarum &c. transit, ex quibus, uti alibi dicetur, hydropem provenire conspicimus. Sic experientia confirmat, febrem quartanam in tertianam haud raro degenerare, & vice versa; Nec minus intermittentes febres continuarum aut lentarum typum recepisse legimus in ACT. BEROL. Dec 2. Vol. 7. Id quod etiam in E. N. C. Vol. 1. Obs. 215, pluribus videre est. Si ad gra-

viores transgredimur affectus, certo certius est, quod illorum mutationes sævissima, quin imo lethalia morborum genera post se relinquere interdum soleant. Exemplo nobis esse possunt hæmorrhoides suppressæ, quæ nonnunquam apoplexiam & paralyfin induxere, quod confirmant *Act. Berol. Dec. 2. Vol. 7. & Brühl. Natur Gesch. Tent. 19. p. 137.*

§. V.

Ut tandem rem ipsam aggrediar, notissimum cuique, imo experientia optima rerum magistra stabilitum autumo, primo quod hæmorrhagiæ enormes aut diutius durantes, vel sæpius recurrentes hydropem inferre valeant. Et quidem ex hac ratione, quia ab insigni hac liquoris vitalis jactura vasa nimium deplentur & aliquo modo collapsa debitum tonum amittunt, unde fit, ut imminuta eorum systole humores rite propellere nequeant. Quo facto sanguis spissescit & lymphæ lentorem contrahit, quæ postea ad vasa lymphatica delata eadem distendit, obstruit & quandoque rumpit, vel saltem tenuior ejus portio per parietum poros transfudat, hincque modo quodam extraordinario in cavitate abdominis sensim coacervatur. Negandum quidem non est, quandoque etiam ab iisdem hydropem curatum fuisse, teste FABRICIO HILD. *Cent. 1. Obs. 50.* verum unica hæc, & forsan aliquæ insuper historiæ curati hydropis nobis non persuadent, ut ipsis statim subscribamus, quippe qui multo magis cum *Principe Medicorum HIPPOCRATE* illas pro lethalibus atque funestissimis in hoc affectu plerumque habemus, qui *Prædict. L. II. §. II.* ita differit: *Cui multum sanguinis sursum & deorsum eruperit & febris insuper accesserit, eum multa aqua repletum iri timor est.*

§. VI.

Hydrops Ascites porro supervenit vulneribus viscerum, præprimis sanguine abundantium & simul vasorum, v. g. hepatis & lienis. Non solum enim enormis hæmorrhagia accidit, imprimis si vasa sanguifera majora læsa sunt, sed magna etiam lymphæ profusio fit, dum non raro vasa lymph-



phatica, quibus hæc viscera præ aliis gaudent, dissecantur. Hisce vasculis lymphaticis læsis, lymphæ cum impetu abdominis cavitati infunditur, ibique tumorem excitat. Quod si autem vulnera etiam sine læsione vasorum, sive sanguiferorum, sive lymphaticorum ipsis infliguntur, hydrops Ascites inde evenire potest, quia dicta viscera inepta ad munus suum obeundum redduntur, dum nimirum hepar bilem neque præparare, neque cæteris corporis partibus communicare valet; non minus etiam lien in actione sua impeditur. In quorum classem vulnera vasorum extremitatum referenda sunt, quæ tantas imo excessivas hæmorrhagias producant, quantas ipsa viscerum vulnera procreant. Ex quibus omnibus non tantum spirituum diminutionem, sed & lymphæ lentorem & stagnationem, quæ vasa lymphatica corrodit, vel plane dirumpit, ut lymphæ vias petat extraordinarias & multa incommoda, imo ipsum hydropem corpori inferat humano, provenire constat.

#### §. VII.

Non minus hydrops quandoque hæmoptysin sequitur, imprimis quando cum tussi vehementiore sanguis prorumpit, vi cujus non solum vascula sanguifera teneriora, sed & lymphatica pulmonum facile rumpuntur, quo factò largæ sanguinis & feri profusio contingit, ex qua tumorem hydropicum nonnunquam provenire videmus. Notandum vero est, hæmoptysin sæpius phthisin, quam hydropem post se relinquere. Sanguis enim, qui in hoc affectu prorumpit, non omnes pulmones excedit, sed notabilis ejus portio in eorum vesiculis subsistit, in quibus si diutius commoratur, stagnat, corrumpitur & tandem acredine sua pulmones corrodit exulcerationemque parit.

#### §. VIII.

Inter reliquas hæmorrhagiarum species, ex quibus hydropem Ascitem provenire observatum fuit, non postremum

num locum obtinet enormis hæmorrhoidum fluxus, quippe qui non corpus solum nectare privat vivifico, sed & calorem nativum aufert, hinc vires enervantur, concoctio vi-  
tiatur, appetitus prostermitur, syncope oritur, foedus totius corporis habitus accidit, color cutis cum virore albicat, caro mollescit, crura vacillant, oculi tument, denique sanguinis circulatio multum impeditur, ac tandem hydrops supervenit, & quæ sunt alia, quibus immodicus hic fluxus corpus nostrum infestare solet, quæ pluribus legi possunt in *Bresl. Natur Besch Tent.* 30. p. 385. Quemadmodum ergo à fluxu hæmorrhoidum enormi hydrops quandoque oritur, ita quoque eundem ab earum suppressione originem ducere non negandum esse censeo. Hæmorrhoidibus enim internis non fluentibus hydrops nascitur, materia, quæ qualitate & copia peccat, ad colon intestinum restagnante, quo inflammato dolor ac sitis magna ingruit. Hinc aqua liberalius hausta & prima concoctione læsa, quæ in secunda non emendatur, affectus hic natales ducit, vid. *FOREST L.* 19. *Obs.* 36. Id quod etiam *GALENUS* confirmat dicens: *Non tantum hydropem, sed & alios morbos retentas hæmorrhoides excitare posse.*

#### §. IX.

Nec minorem locum in hæmorrhagiarum numero obtinet vomitus cruentus, qui interdum ad hydropem symbolum suum confert, si nimirum stagnatio sanguinis in liene præcessit, quam stasis, hancque inflammatio excipit, tandemque vomitus sanguinis supervenit. In tali ergo vomitu nigro eventus certissime est funestus, dum, si initium acutum fuerit, lentiore progressu hydrops sequitur. Est vero huius non contemnendi affectus causa materialis remota spissitudo sanguinis circa venam portæ, sive ab impeditis mensibus, sive hæmorrhoidibus, sive aliunde originem illa sumferit. Causa propior est, sanguis hypochondriacus venæ portæ speciali congestione è ramo mesenterico in ramum sple-



splenicum restrictus. Vel ut STALPART VAN DER WIEL in *Obs. Rar. Med. Anat. Chir. Cent. post. P. I. Obs. 16.* observavit, *causa hujus mali nulla alia potest esse, quam magnus aliquis sanguinis orgasmus atque insuper obstructions quædam in vasis latentes gastricis à vena celiaca procedentibus & ad lienem excurrentibus.* Nec minus huic inordinatæ sanguinis evacuationi mictus cruentus adjungendus est, qui nonnunquam hydro-  
pem attulisse fertur, præprimis si jam adfuetus repente & incongrue plane cohibetur, gravissima symptomata inducit: Sequuntur enim varii adfectus spastici, tabidi, tumores oedematosi, hydropici, febres acutæ inflammatoriæ viscerum. Quod si enim humores vel per se, vel mala arte cohibiti in renibus stagnant, secretionem feri in iisdem labefactari necesse est, unde hic latex in sanguine accumulatur & vel per διαπήδησιν exsudat, vel per ἀνασώμασιν exit, vel etiam, quod rarius accidit per διαίρεσιν in abdominis cavitatem effunditur. Quod si vero mictus hic diu multumque continuat, eadem ratio, quam supra de hæmorrhagiis nimis allegavimus, hic quoque militat.

§. X.

Convertimus nos secundo ad illas hæmorrhagias, quæ sexui muliebri familiares sunt, inter quas primo nobis sese offert nimis mensium fluxus, qui tanta illi mala struere solet, ut inde in gravissima morborum genera præcipitetur. Cuivis enim facile erit judicatu, tam immodicam sanguinis excretionem non solum corpus cachecticum, sed & ultimo hydropicum reddere, insigni virium debilitate & gravitate crurum coxarumque eam concomitante. Ut autem, quod præcipuum est, immodicæ hujus excretionis causæ investigentur, considerata venit sanguinis erumpentis copia & delationis modus. Ex his namque cognoscitur, utrum à vasorum ruptura, an à reseratione, an vero erosione ista fiat, amplioribus quippe vasis ruptis, aut apertis magna sanguinis copia confertim profluit, unde non solum



partes fermentativæ exhauriuntur, sed & notabilis spirituum jactura fit, quo factò humores vel plane subsistunt, vel saltem impeditè moventur. Quod si hoc contigerit, vascula minima & lymphatica & sanguifera toti humorum massæ capiendæ imparia evadunt, adeoque ab ejus mole præcipue sicubi illi stagnant, perrumpuntur atque hydropem generant. Ubi malum hoc diuturnum est & sæminas juniores invadit, teste WALDSCHMIDIO & FORESTO, si non brevi moriuntur, viam vel ad atrophiam, vel ad ipsum hydropem sternit, semelque hoc morbo graviter laborantes plerumque valetudinariæ manent, quia corpus multum debilitatur & ad cæteras actiones vitales segnius redditur. Ne quid dicam de nimio lochiorum fluxu, sive abortivus fuerit, sive partui legitime excluso supervenerit, utpote qui cum prodigo mensium fluxu in multis convenit & eodem prorsus modo ad affectum, de quo sermo nobis est, disponit, quare ne nimis prolixi simus, de eo plura verba facere hic supersedemus.

### §. XI.

Jam ad istam sanguinis evacuationem, quæ arte fit, devenimus, quæque si nimium adhibetur sæpiusque repetitur, nobis facile noxas struere potest periculosissimas & hydropem pariter inducere; quamvis non negandum sit, V. S. sem alias remedium generosum merito appellari. Certo enim certius est & experientia firmatum, per V. S. spiritus & vires exhauriri, actionesque ad vitam maxime necessarias labefactari, obstructions excitari & tandem hydropem inferri, vid. *E. N. C.* ll. 2. *Obs.* 169. Ex qua allata ratione patet, quantum mali V. S. nimix & sæpius repetitæ parere soleant, præsertim si intempestive instituuntur. Hinc facile concludendum, hydropem, nisi ab acrimonia & spasmodica vasorum constrictione sit, V. S. nunquam admittere, ea de causa, quoniam non modo ad virium integritatem respiciendum est, quas præsens affectus maxime postulat sed etiam



etiam morbi durationem; in inveterato enim plus damni, quam commodi afferet. Quare etiam *Hist. Morb. Uratisl. Collectores Anno 1699.* hæc habent. *Nostri in locis ubi hydrops fere semper est soboles depauperati sanguinis, diminuti caloris, corruptelæ viscerum &c. cum summo ægrotantium periculo celebratur ac apud illas fœminas, quæ ex suppressione mensium, aut viros, qui impedito fluxu hæmorrhoidum in ascitem labuntur, nonnisi inter initia cum successu vena pertunditur.* Quibuscum etiam RIEDLINUM *Lin. Med. A. II. Mens. Octob. Obs. 2.* consentientem deprehendimus, qui expressis verbis asserit: *V. S. intermissionem ab hydropse præservare.* Equidem prostant exempla, quæ hydropem V. S. quandoque curatum nobis sistunt, uti ipse ZACUT. *Lus. Med. Princ. Hist. Lib. II. Hist. 118. & HILD. Cent. VI. Obs. 41. & 42.* quædam nobis scripta reliquerunt. Sed si horum Doctissimorum Virorum judicia penitius consideramus inde colligendum est, in nullis aliis subjectis, nisi in plethoricis & quidem statim in principio morbi illam locum habere; In aliis vero v. g. in phlegmaticis & succulentis maxime hydropem, in siccioribus autem magis hecticam inducere sæpius repetitam.

## S. XII.

Quid tandem de hæmorrhagiis, quæ enormes fuerant & diu duraverant, cohibitis itemque suppressis (1) per adstringentia fortiora & positive talia sit judicandum, ex sequentibus patebit. Noto notius est, adstringentia alias optima esse medicamenta, verum eorum usus semper sit circumspectus necesse est, in iis etiam morbis, ubi prompta & celeri opus est cohibitione, dum nullo alio modo, nisi adstringendo medelam inferunt, hinc eorum usum maxime cautum atque moderatissimum suademus. Id quod etiam magni nominis & felicissimi Practici, inter quos non postremus est CEL. JUNKERUS, qui *Tab. de hydropse univers.* ab usum adstringentium turgente eodem tempore sanguine e. g. in febribus & hæmorrhagiis inter causas hydropis procatarticas recenset. In parva enim si propinantur dosi, fluxum



non sedant, quin potius augent; in majori vero quantitate si præscribuntur, præter alia fontica mala quandoque & hydropem ipsum parere solent. Verbo in omnibus hæmorrhagiis ab incondito adstringentium usu cavendum sibi est sedulo. (2) per topica seu frigida externe applicita, indeque perturbatam hæmorrhagiam idem affectus nonnunquam excitatur, uti PELARG. *Colleg. Pract. Sect. 1. Membr. 2. §. 7.* de puero quodam hæmorrhagia narium correpto scribit: Anno 1712. ohnaesebr ward ich zu einem aus der Nase blutenden Knaben von sensibler Constitution geruffen/ derselbe hatte schon unter allerhand Haus-Mittel etliche Stunden geblutet; und weil die Natur durch kaltes Wasser/ Eiß/ Binden und dergleichen alles uno impetu appliciret/ confus gemacht worden/ so war die Hæmorrhagie nicht zu stillen/ biß fast alles Geblüt fortgeflossen. Der Knabe verfiel darüber in die Wassertuche und starb nach 6. biß. 7. Wochen. Ex quibus allatis fatis superque constare arbitror, quod non semper in ejusmodi excretionibus, etiamsi majori in quantitate prorumpant, ad topica seu frigida externa sit confugiendum, sed potius naturæ ad tempus quoddam cedendum, donec istius quantitas nimia suspecta nobis videatur. Nam si a plethora, nulla diæta compescibili, natales ejusmodi hæmorrhagia ducit, natura ipsa terminos non facile transgreditur. Quapropter hæmorrhagia quodammodo excedens & non prodiga præ aliis critica per modo memorata topica nunquam sistenda, quoniam suppressionem arte susceptam incommoda ab ista, quæ sibi relicta est, non adeo metuenda, insequuntur periculosissima, conf PELARG. l. c.

§. XIII.

Secundus morbus, è quo hydropisia pronasci solet, febris est, morbus iste universalissimus & communissimus, qui vel solus affligit, vel cum aliis affectibus complicatus est, unde mater morborum & nutricula Medicorum appellatur, qua de causa etiam tritum illud ortum est: Vis sine febre mori?



mori? Est autem febris inordinatus M. S. motus à fermento peregrino ortus, quod in ventriculo & primis viis hæret, sanguinemque exagitat, donec beneficio naturæ vel discutiatur, vel insensibile reddatur, unde plerique Autores de fermentatione, effervescencia & ebullitione multa verba faciunt, sed plerique nihil dicunt de peculiari intentione, à qua motus excitantur, estque illa nulla alia, quam ut recrementa in M. S. nimia in copia accumulata beneficio horum motuum è corpore eliminantur, quo sensu SYDENHAM febrem salutarem naturæ conatum appellavit. Verum enimvero si naturæ vires adeo debilitatæ fuerint, ut munus suum in noxiis humoribus expellendis haud rite peragant, tunc à materia peccante superflua, magis si ars hunc defectum non supplet, atque medicamentis illam non satis evacuat, viscerum & vasorum obstructions serosique sanguinis abundantia inde oritur, unde hydropi viam sternit, ceu pluribus HORST. *Obs. Sing.* 28. L. 4. demonstravit. Non parum incrementi hydropi contingit, quando febris, in qua ardor & dolor in dextro hypochondrio est, antecesserit, qui, uti nobiscum THONERUS L. 1. *de Febr. intermitt. Obs.* 5. consentit, ex ebullitione humoris biliosi in venis mesaraicis haud procul ab hepate distantibus originem ducit, quo sitis imensa excitatur, quam nimia etiam frigidi potus ingurgitatio & ex hac abundantia feri sequitur, qua vascula lymphatica adeo distenduntur, ut quandoque ipsorum ruptura & hinc inde lymphæ profusio in abdominis cavitationem, quam tandem hydrops pressio pede sequitur, accadat.

§. XIV.

Sic & secundum HOECHSTETT. *Dec.* III. *Cas.* I. eidem affectui nutrimentum præbent febres intermittentes, inter quas primum locum obtinet tertiana legitima in hydropem mutata, quem sequenti modo sibi vindicat: scilicet sanguis crebris istis fermentationibus, quas peperit morbi diuturnitas, præcipue in natu grandioribus, spirituosius partibus de

pauperatur, unde summa jam eorundem laborans inopia succos cum alimentis ingestos non amplius valet assimilare quorum cruda adhuc indigestaque moles in crura tandem deponitur eaque intumescere facit, quibus distentis neque ulterius quicquam admittentibus alias etiam partes, imo & ventrem ipsum occupat, unde verus hydrops formatur, præprimis si febris cum obstructione viscerum conjuncta deprehenditur vid. HORST. *Lib. 1. Obs. 14.* & FOREST. *L. 3. Obs. 36.* Neque silentio prætereundum est & febrem quotidianam, uti RIEDLIN. *Cur. Med. Cent. 6. & 7.* testatur, quandoque hydropem pro comite habere, quæ valde diuturna & Clinicorum Practicorum observatione cæteris febribus deterior habetur, quoniam in ista & hepar & splen & ventriculus laborant. Si febrim tertianam porro consideramus, nullum est dubium, quin & hæc hydropem nunquam proferat, imprimis si ex aquæ frigidæ potu oborta est, aut magna potus copia in paroxysmo assumpta nec diaphoresi nec diuresi debita iterum eliminatur. Corpori enim vel ex febre, vel ex motu prægresso æstuante omnis potus frigidus noxam infert, dum humorum coagulationes, solidorum obstructions & ex hisce venientem hydropem generat, quod ipsum E. N. C. I. 6. *Obs. 52.* nobis pluribus tradunt. Quid multa dicam de eadem febre, si quandoque hepatis obstructionem conjunctam habet, quo in casu diurus hic affectus frequentius insequitur. Hoc enim viscus, quod à multis & quidem non sine ratione pro hydropis foco habetur, utpote vasculis lymphaticis instructum plurimis, si forte infarctus patitur, huic malo inducendo præ aliis aptum natum est, vid. FEL. PLAT. *Obs. L. 3.*

§. XV.

Hujus farinæ quoque sunt febres corruptæ, quæ, si à stato suo atque ordinato successu & progressu vel ad insolitas & irregulares commotiones impelluntur, vel penitus supprimuntur, non solum in schemata alia morbida trans-  
eunt,



eunt, sed revera tam materialiter, quam formaliter, uti scholæ loquuntur, non in alios solum, verum etiam in deteriores morbos converti solent. Sic v. g. si quis laboret febre intermittente, quæ tempus curæ ejusmodi febrium destinatum transgreditur, hinc auxilium alius, qui vel ipse rei Medicæ gnarus non est, adeoque malum regimen instituit, implorat, vel in agyrtæ cujusdam medicatione spem suam collocat, qua in varia morborum genera præcipitatur, nonne miser ille exemplo suo comprobabit, ex tali perversa directione febrem alias regularem in corruptam mutatam, vel penitus suppressam experietur? Probe itaque attendendum est, ne febris legitima è perversa methodo in corruptam, hæcticam, aut hydropem ipsum deducatur, vid. *Act. Berol. Dec. 1. Vol. 2. § 6. & CELEB. STAHL. de Febr. interm. turbat. ac corrupt.* Februm corruptarum classi & quartanam adscribi posse censeo, quippe cujus fomes ex materia viscida, tenaci, plerumque in visceribus hypochondriacis cum vena portæ connexionem habentibus v. g. hepate, liene & glandulis mesaraicis, rarius in primis viis hærente non male deducitur, id quod nexus reciprocus, quem hæc febris cum ictero, cachexia, tumoribus oedematosis & asciticis fovet, satis superque confirmat; modo enim quartana legitime superata prægressos hypochondriacos affectus solvit, incongrue vero suppressæ vel corruptæ scirrhusitas hepatis lienis, glandularum mesaraicarum &c. oedema, hydrops, hæctica, asthma & tussis sicca, icterus præcipue niger succedunt. Quoniam ergo dicta materia ob insignem lentorem, uti par est, medicamentis etiam appropriatis evacuari nequit, facile eam recensiti morbi frequentius hydrops juxta THONERUM, *L. 1. de Febr. interm. Obs. 9.* excipiunt, præsertim cum ventriculi coctio impediatur, locoque chyli laudabilis pituita viscida ac variæ cruditates in M. S. deriventur, quæ in angustiis pororum & glandularum hærentes in causa sunt, ut neque secretiones, neque excretiones in hoc febris genere

re



re æque ac in aliis rite succedant, uti PECHLINUS L. 2. Obs. 21. LANGIUS L. 1. Epist. 48. FORESTUS L. 19. Obs. 29. pluribus nobis inculcant.

§. XVI.

Non autem tam ex ipsa febrium natura, quam potius mala earundem curatione dirus hic affectus plerumque fluere solet, si nempe materia peccante non satis evacuata febris sistitur atque cohibetur, quo plerumque pedum tumor primum, post asciticus cum aliis periculosis effectibus excitatur. Corruptitur vero febris præter malam ægri diætā tam perversumque regimen adstringentibus, quæ si nimis cito & intempestive adhibentur, non solum motus naturæ spontaneos, uti vomitus, sudores aliosque conatus laudabiles, per quos materiam peccantem removeare intendit, supprimunt, verum etiam colatoriorum constrictionem inferunt, qua debitæ secretionis sufflaminantur, sanguinis & feri circulatio turbatur, atque tandem vasorum teneriorum ruptura, & per consequens hydrops supervenit. Quanta ex hisce per adstringentia cohibitis conatibus mala exsurgere soleant è CELEB. STAHLII *diff. de Febr. interm. turbat. & corrupt. supra cit.* fusius colligendum est. Inter adstringentia præ aliis allegari meretur Cortex Peruvianus, à cuius strenuo usu hydropes quotidie oriri observamus, cum primis in subjectis phlegmaticis, quæ præ aliis ad ejusmodi malum proclivia sunt; facta enim dicto cortice, uti in aliis partibus, ita & potissimum in hepate constrictione sanguis spissus atque pituitosus per minima ejus vascula rite circulare nequit, hinc stagnans infarctum atque obstructionem sensim generat; magis si præmature exhibeatur, corpore antea ab impuritatibus non sufficienter liberato, facile jam recensita mala supervenire queunt. Equidem nos non latet, dari plurimos, qui hujus corticis usum magnis laudibus extollunt, neque sine ratione, illum enim debito morbi tempore adhi-



adhibitum , subjecto & temperamento , morbis prægressis aliisque circumstantiis probe consideratis excellens remedium esse nemo facile inficiabitur, quod omnes, qui de eo aliqua reliquerunt, uno ore testantur, vid. MORTONUM *Pyretol.* VALENTINUM *de polychr. exot.* BARTHOLO. *Hist. Anat. 50. Cent. 5.* BLEGNY *Zodiac. Med. Gall. 1682. Febr. Obs. 29. 1683. Jul. C. 6. &* BOLLI *Epist. Italico Idiomate de hoc vegetabili scriptam.* Vis enim agendi hujus corticis consistit tum in constrictione solidorum, tum in condensatione humorum, dum secundum HARVEUM *de vanitat. Med. C. 28.* fermentationes & leviores ebullitiones in febribus intermittentibus supprimit & particulas mucosas tartareasque ceu viscosas intermedias humorum in vasis mesaraicis & circa viscera amaritudine sua adstringente arcte compingit. Cæterum experientia firmatum est, corticem Chinæ specifica virtute febrifuga gaudere, quibus autem viribus vim hancce febrifugam exerceat, de eo non eadem est autorum commentatorumque opinio, vid. CEL. FRID. HOFFMANNI *Diff. de Chin. Chin. modo oper. usu & abusu.* Quod vero ad rectum illius in febribus usum pertinet ex sequentibus patebit. Nemo non novit, quam diversis, imo perversis judiciis efficacissima alias ac heroica remedia, quini-  
mo illa, de quorum usu multis abhinc annis tanto certiores facti sumus, quanto meliorem illorum effectum semper annotavimus, sunt exposita, dum ab his laudantur, ab aliis vero culpan-  
tur. Quod fatum quoque cortex peruvianus expertus est, qui certe efficacissimum & tutissimum est remedium, si recte illo utamur, valde autem noxium & insegurum, quando empirice, h. e. imprudenter & imperite, nulla corporis ægrotantis, causæ febrilis, temporis aliarumque circumstantiarum ratione habita usurpatur, vid. supra laudatum FRID. HOFFMANNUM *Diff. de rect. cort. Chin. usu in febr.* Rationem quod attinet, qua optime per Chinam Chinæ febris curatur, consistit ea in amaritudine. Nam cum omnia amara ventriculo, nervis ac spiritibus animalibus



bus admodum grata usu multo comprobentur; sequitur, quod & cortex peruvianus ob excellentem suam amaritiam vi febrifuga, imprimis in intermittentibus verno & æstivo tempore grassantibus, præditus sit, conf. MORTON. *Pyretol.* C. 6. & 7. PELARG. *Coll. Pract.* S. 1. *Membr.* 7. §. 18. Sed quidquid sit, cura ejus est & erit infida atque in quibusdam subjectis periculosa, siquidem non recidivas modo longe graviores, verum & novos prorsus & insanabiles morbos usum dicti corticis peruviani insequi, cachexiam scilicet, tumores pedum oedematosos, hydropem, ventriculi debilitatem, pathemata hypochondriaca, febres lentas & hæcticas toto die observamus &c. Quare etiam ETTMÜLL. *Oper.* Tom. II. p. 277. illum non solum infidum vocat remedium, sed & p. 528. asserit, ejus usum ordinarie fere alvi præclusionem, tumorem & duritiem abdominis ac dolores tensivos consequi solere. Et AUG. QUIR. RIVINUS Prof. pariter Lipsiensis *diss. de Febr. interm. Medicos quosdam*, ait, sibi gratulari quando ægrotantes è Charybdi in Scyllam deduxerunt, i. e. Febrem hoc remedio feliciter profligarunt, ægro interim vel contabescente, vel intumescente ab humoribus pravis atque hydropè. Non minus per Chinam Chinæ febres corruptas oriri sæpius videmus, vid. STAHL. *diss. de Febr. interm. corrupt. & turbat.* ACT. BEROL. Dec. I. Vol. 2. §. 1. BRESL. *Natur. Gesch.* Tent. 18. & 19. conf. BERNH. RAMAZZINI *diss. Epistol. de abusu Chinæ* Chinæ quæ, quia hoc argumentum solide pertractat, legi utique meretur.

§. XVII.

Quemadmodum itaque è perverso febrium regimine plurima mala deploranda in genere profluunt, ita etiam cortice peruviano ἀμελόδως & indiscriminatim adhibito metastases difficulter solubiles ad viscera fieri cernimus. Ubi enim per varias tumultuarias curationum tentationes non solum, verum etiam per absurda ægrotantibus sensibilibioribus in paroxysmis concessa regimina, aut assumpta nocentia febres intermittentes longius non saltem protrahuntur, sed inter-



ea per varios typos pervertuntur, viscera demum abhinc & inde dispulsa & compulsa materia obsidentur (quod ex hypochondriorum tensione & duritie, lassitudine artuum, respiratione oppressa, lurido faciei colore, interno depa-  
scente æstu, siccitate oris, appetitu vacillante & oedemato-  
sis pedum tumoribus colligi potest) tunc certe dubiam alit-  
spem Medicus de recuperanda ægroti valetudine vid. *ACT. BEROL. Dec. 1. Vol. 2. §. 1.* Non autem in omnibus subje-  
ctis illud æque evenit, sed quam maxime in pituitosis &  
phlegmaticis & phlegmatico-sanguineis, ad tumores serosos  
pronis, & in iis, quæ debilioris sunt constitutionis, in sexu  
sequiore atque in quibus naturæ robur à morbis prægressis  
aliisque causis dejectum est, habitus spongiosi, laxioris &  
turgidi, vitæ otiosæ dediti, item in cachecticis, in quibus  
facile perversa ejusmodi curatione, nempe applicatione reme-  
diorum adstringentium obstructio glandularum & vasorum  
lymphaticorum, itemque sanguiferorum minorum conci-  
liari potest, præprimis quando jam ad cachexiam proclives  
sunt, quæ omnino à mucido-serosa lymphæ inviscatione &  
motus tonici remissione originem ducit, huic incongrua  
medicamentorum applicatio accedit & reliquis corporis vi-  
sceribus malum communicatur. Quæcunque itaque ca-  
chexiam inducunt, tandem etiam hydropem inferunt, hinc  
facile constat, quanta prudentia opus sit in regimine isto-  
rum morborum, qui corpus cachecticum reddunt. Enim-  
verò cachexia laborantes, teste quotidiana in Praxi expe-  
rientia in proxima dispositione ad hydropem positi sunt &  
denique in statum asciticum devolvuntur, in iis vero subjectis,  
quæ siccioris sunt habitus, eadem non æque contingunt,  
utpote in quibus hecticæ magis febres & lentæ succedere  
solent, *cont. URATISLAV. 1699. p. 110.*

§. XVIII.

Cachexiæ speciebus non immerito annumerantur ex-  
cretiones quædam, vel ad externum corporis habitum, vel



ad alia loca excretoria factæ, quæ, si citius quam par est, aut minus conveniente methodo supprimuntur, affectus nostri causa quandoque existunt. Sic v. g. diarrhœa, præfertim serosa & critica, quæ è salutari naturæ intentione ferum, vel etiam alios humores superfluos & corpori noxam illaturos per ejusmodi evacuationem remove intendit, si mala & intempestiva medicatione cohibetur, viis hisce occlusis, pedes œdematosos & tandem colluviem serosam inde pronasci observamus, ceu videre est apud WEL-  
SCH IUM *Dec. 7. Cur. 4.* Non minus idem malum profert scabies retropulsa, quæ alias tanquam naturæ conamen humores nocivos ad corporis superficiem pellit, verum si imprudenter tractatur & remediis incongruis externe applicitis repellitur, infausta symptomata inducit, nempe dyspnoeam gravem & contumacem, quæ facile in ascitem degenerat, vid. BAGLIV. *Prax. Med. l. 2. §. 9.* & quidem ea ex ratione, quoniam ejus causa in stasi humorum lymphatico-serosorum in corruptionem abeuntium consistit, quæ stasis, si incongrue compescitur, in dirum & deplorandum nostrum affectum ægros præcipitare omnino valet. Non raro etiam in hydropem Icterus terminatur, quippe qui à vitiata bilis eccrifi provenit, unde autem hoc vitium oriatur, per individua non semper liquet. Negari quidem non potest, quod interdum obstructio ductus cholidochi hoc vitium inducat, frequentius tamen istud in constrictione & infarctu hepatis quærendum est, quæ strictura vel humoris biliosi sequestrationem, vel transitum illius ad vesiculam fellis & intestina intercipit. Pari modo ab ulceribus, quæ diu antea manarant, item fonticulis, qui à longo abhinc tempore fluxerant, subito & sine vicaria evacuatione substituta consolidatis, idem quandoque affectus insequitur. Eadem ratione de sudore è tota corporis superficie erumpente & male cohibito, imprimis nocturnæ circa æquinoctia aut critico in febribus salutari naturæ consilio contingente, aut in  
iis,



iis, qui huic excretioni universali à longo tempore assueti fuerunt, idem malum haud raro oritur, recrementa quippe salino - sulphurea & aquosa in corpore detenta ad viscera interiora regurgitant atque multum accumulata exitum quaerunt & non raro in abdominis cavitate inveniunt. Scorbuticos non meliora fata manent, nam quoties radices malum egit, & digestionem necessariam valde turbavit, toties tabes & hydrops creditorum inducunt concursus brevi mora lethalem, potissimum si vel purgantibus fortioribus utuntur, aut calidiores cibos & potus ingurgitant. Huc quoque referendi sunt asthmatici, siue asthma à scorbutico vel alio affectu sit, & sic convulsivum aut humorosum notetur, illud nihil frequentius excipit, quam cachexia, & succedaneus hydrops ascites. Quid tandem sudor pedum retrocedens efficiat, experientia quotidiana satis superque nos edocet. Qui sudor, si per adstringentia remedia, siue externe, siue interne applicita cohibetur, stricturem fibrarum producit, quæ, quando in externo corporis habitu contingit, transpirationem imminuit, vel plane supprimit. Quanta vero mala ex impedita transpiratione pullulent præter innumera Auctorum testimonia plurimi ægri suo cum damno toto die experiuntur. Quod modo de sudore dictum, de urina pariter valere vel me tacente quivis facile intelligit, hanc enim natura vel arte suppressam & in M. S. relictam aliorum delabi & abdominis cavum quandoque inundare. Tandem etiam, qui defluxionibus catarrhalibus in juventute sæpius infestati fuerant, & hæ vel sponte emanent, vel arte, sed mala cohibentur, in provectiore ætate oedematosi facile fiunt, inundatione abdominis postea subsequente.

§. XIX.

Jam de causis, quibus agentibus diluvium hoc microcosmicum à morbis supra dictis oriatur, quædam subnectemus de quibus eo minus prolixi erimus, quo magis è dictis patet, plurimas earum hinc inde jam allegatas esse. Hydro-



dropis itaque causa antecedens est mala hepatis constitutio, nempe obstructio, infarctus, scirrhus. Si nempe ejus viscus fere totum vasculosum ob atoniam sanguine nimium infarcitur atque induratur, non modo biliosi humoris secretio intercipitur, sed & sanguinis nec non lymphæ motus vitatur, & quidem, si hæmorrhagiæ enormes præcesserunt, uti aliorum, ita & hujus visceris tonus ac robur valde debilitatur, unde fit, ut humores in illud, ubi minorem renisum inveniunt, facilius irruant & ob defectum elasticitatis, qua promoveri ulterius debent, ibidem congerantur atque magis magisque stagnet. Quod si vero februm cura adstringentibus suscepta fuit, idem evenire verosimile est, sed contraria ratione, tunc enim nimia vasorum & partium stricturæ humores non libere transmittunt, unde pariter stagnatio atque obstructio non potest non contingere eo facilius, quo major à nativitate est vasorum sanguiferorum angustia. In utroque casu sanguis ad vasa & viscera vicina regurgitans in ventriculum per vasa brevia effunditur, unde vomitiones cruentæ, ex disruptis uterinis vasis menses copiosi & uteri hæmorrhagiæ, ex venis ani nimium apertis enorme hæmorrhoidum profluvium, & in renibus mictio cruenta exoritur. Lymphæ vero itinere per vasa lymphatica, quæ his in visceribus discurrent copiosissima, intercepto humor iste lentorem contrahit, tarde movetur, restagnat & copiosius in vasis abdominis collectus hydatides format, quibus maxime si à prima formatione teneiora fuerint, tandem disruptis, feralis lymphæ extravasatio & partium corruptio inducitur. Hinc attenta observatione patescit & cachexiam & scorbutum & ipsum hydropem plerumque ex hepatis obstructione & infarctu primordia capere, vid. PLATER. *Obs. L. 3.* GABELCHOV. *Cent. 6. Cur. 91.* PISON. *Morb. à seros. Colluv. S. 4. C. 4.* Quod assertum nostrum autopsia Anatomica tantum non in omnibus cadaveribus confirmat, nempe hydrope defunctis hepar infarctum,

du-



durum, scirrhosum & coloris plerumque pallidioris aut variegati, quandoque abscessibus obsessum, aut hydatidibus repletum esse, conf. ACT. HAFN. Vol. 5. Obs. 33. RUYSCH. Obs. Anat. Chir. 45. 86. & 87. Cujus rei historias cum ubique in *Actis & Ephemeridibus Medicis* annotatæ legantur plures cumulare nolumus. Interim vero BARTHOLINUS *Hist. Anat.* 2. Cent. 5. omnem hydropem hepatis labe initi scribit, quod viscus RUYSCH. Obs. 65. *Thes. Anat.* I. p. 84. seq. II. p. 47. VI. p. 10. VIII. p. 12. IX. p. 6. sæpissime in hydatides degeneratum annotavit & ab earum congerie hydropem deducit, Obs. Anat. Chir. 27. & 46. quæ si rumpuntur, aut fissuram hepatis, aut ipsum hydropem inducunt. Idem quoque intelligendum est de mesenterio, dum nimirum ejus glandulæ in hydatides pariter abeunt, vid. TULPIUM L. IV. Obs. 44. quarum auxilio aquæ intercutēs quandoque generantur. Ex hisce igitur facile colligendum, hepatis malam constitutionem reliquis abdominis visceribus corruptionem conciliare posse, verum notandum, quod hæc quandoque potius effectus morbi, quam causa esse soleat. Lympha enim ex hepate reliquisque dictis visceribus profluen & acrior reddita partibus ipsi innatantibus corruptionis & putrefactionis causam præbet, vid. PLATERUS Obs. L. 3. BLANCKARDUS *Anat. Pract.* Cent. 1. Obs. 24. & Cent. 2. Obs. 19. BONETUS *Sepulchr. Anat.* L. 3. S. 20. Obs. 2.

## §. XX.

Jecur potissimum affectum esse symptomata quoque in hoc malo occurrentia confirmant, nempe dolor tensivus, & gravativus hypochondrii dextri cum duritie conjunctus, quæ obstructioni & scirrhositati hepatis ex cachectico statu natales suos debet, unde non solum tussis sicca & hypochondriaca, sed & aspectus corporis luridus & cachecticus oriuntur, qui aspectus à mala chylicatione & simili sanguinis constitutione dependet, dum nimirum ille serosior minus-  
que



que spirituosus evadit , unde non nisi serofas demittit partes , quæ dictum colorem inducunt. Haud parum quoque discruciantur ægri dyspnœa , quæ omni fere hydropis speciei familiaris , gravissima tamen asciti est , cum hepatis infarctu conjuncto , quia præter quod aquarum moles diaphragma sursum detinet , jecur ejus motui liberiori obstat , quæ respirandi difficultas ideo etiam a corporis motu augetur. Urina ad mensuram eorum , quæ assumuntur ex liquidis pauca , crassa & in asciticis præcipue cum copioso subinde sedimento rubro lateritio emittitur , quibusdam tenuis effluit , alba & cruda instar aquæ. Visa quandoque crocea , quæ cum adsit , hydropis statum desperatum pronuntiant Autores , imprimis si febricula continua concurrit. Aqueus color , quocunque alio durante tumore , semper optimus habetur. Verum si urina lixiviosa est & sedimentum roseum exhibet , viscerum labem indicat.

## XX.

Quæ , dum dicimus , non id volumus , ac si hepar solum & semper , utut præ aliis frequentius affectum sit , sæpius enim contingit , ut illud , ceu ex observationibus liquet , nonnunquam bene constitutum in hoc morbo annotatum fuerit , si nempe tantum vascula quædam lymphatica disrupta sunt , vel si hydatides multæ in abdominis cavitate reperiuntur. Liceat hic allegare verba THEOD. KERKRINGII *Anthropog. Ichnogr. C. 1. Andisne ex hydatidibus fieri hydropem , & tunc fieri , quando rumpuntur.* Verum rarius ne dicam rarissime accidit , ut vel hoc , vel reliqua viscera illæsa maneant atque integra vid. GOKEL. *Cent. 2. Cons. 41.* RHODIUS *Obs. 4. Cent. 3.* ARETÆUS *L. 2. C. 1. de sign. & caus. morb. diut.* BONET. *Sepulchr. Anat. L. 3. S. 20. Obs. 16. & 12.* Ubicunque enim glandulæ , vel vasa lymphatica sunt in abdomine , ibi ascitis invenimus causam effectricem. Ergo non tantum in hepate , sed & in liene , renibus , glandulis mesenterii , omento , pancreate &c. sedes erit causæ hujus



jus morbi proximæ. Sic malum nostrum lien ex hepatis  
 intumescencia ipsi simul tumorem excitante inducit vid.  
 PISON. *l. c.* PEYER. *Parerg. Anat. & Med. 5. in Act. Lips.* 1682.  
 BONET. *l. c. Obs. 6. & 7.* BLEGNY *Zodiac. Med. Gall.* 1682.  
*Mens. Mart. Obs. 7.* vel quando ipse apostemate quodam af-  
 fectus est *E N. C. III. 5. & 6. Obs. 279.* PLATER. *Obs. L. 3.*  
 tunc utique hydropem interdum proferre solet. Quem ef-  
 fectum quandoque etiam à renum vitio observamus, si nem-  
 pe ob constitutionem p. n. ferum humorem minus suffi-  
 cienter secernere & excernere valent, quo fit, ut serum per  
 arterias emulgentes continuo cum sanguine ad eos delatum  
 nulla secretionem facta per venas refluat, in M. S. coacerve-  
 tur, & quandoque extraordinario modo in abdominis ca-  
 vitatem effundatur. Idem malum produci solet à glandulis  
 mesenterii obstructis & induratis, quo facto illæ lympham  
 non transmittunt, nec in & per debitos canales reducunt,  
 quare vasa lymphatica à noviter succedente infarciuntur &  
 tandem rumpuntur. Eadem fere ratione deplorandus hic  
 morbus adscribi potest omento male constituto, cujus vero  
 status p. n. rectius effectus quam causa hujus mali dicendus  
 esse videtur, si nempe membrana hæc expansa aquis à sta-  
 gnatione acrioribus redditis & corruptis diu innatarit. Suc-  
 cedit quoque hydropisia indurationi pancreatis, quæ humo-  
 ribus lentis & viscidis in minimis ejus acinis glandulosis  
 stagnantibus debetur, & pariter dirum hunc affectum nunc  
 præcedit, nunc etiam sequitur. Quibus rite pensitatis non  
 male pronuntiatur: Nullum fere hydropem esse sine visce-  
 ris alicujus obduratione. Quare etiam CELSUS *L. 3. c. 21.*  
*jamdudum contendit, non hujus visceris unius hoc vitium esse*  
*hydropem. Nam & splene adfecto & in totius corporis malo habitu*  
*illum fieri.*

### §. XXI.

Sic & ventriculi affectus hydropisia sæpissime excipit,  
 præprimis si appetitus dejectio vel præcedit vel concurrit.

D

De-



Deficit autem appetitus modo ob lymphæ gastricæ vitia aut defectum, modo ob ventriculi atoniam, quæ quandoque etiam hydropis causa evadit, potissimum si cibus & potus, qualitate & quantitate peccans, nempe spiritus ardentes cibique crassi & dyspepti ingurgitantur, quia chylus pariter crassus, viscidus alioque modo vitiatus præparatur & lymphæ quoque lenta inde generatur. Qualis enim chylus, talis sanguis & alii humores inde separati, & per consequens etiam lymphæ. Ex quibus facile colligitur, hydrophem quoque venire à chylicatione & sanguificatione læsa, si quando chyli laudabilis loco serosus & viscidus ad M. S. deferatur eique hanc labem affricat, uti vicissim lymphæ in ventris cavum effusa adeoque chylo in ductu thoracico non affusa, utraq; hæc actio non æque feliciter peragitur. Quibus tandem adjungimus vel vesicæ urinariæ, vel etiam ureterum à liquore nimium accumulato tandem facta ruptura utut rariore, qua posita lotium non potest non abdominis cavitatem inundare. Nam & hoc tenendum est, tam lympham laudabilem, quam etiam serum excrementitium in hoc morbi genere loco peccare.

§. XXII.

Ex iis, quæ supra à nobis dicta sunt satis liquere autumo, & partes solidas, seu varia organa (maxime ista, quorum munus est humidum superfluum à M. S. sequestrare) æque ac fluidas ad d. rum affectum nostrum, quotidiana experientia teste, disponere. De hisce paucis addere liceat, quod lymphæ postquam lentorem contraxit, ad quem natura sua valde proclivis est, frequentissima hujus mali causa existat. Hæc enim vitio laborans circulum suum debito modo non peragit in vasis, quæ nomen ab ea acceperunt, accumulatur & aliquatenus stagnat, qua stagnatione invalescente nunc apertis osculis per *διασπορῶν* sed rarius exit, nunc per *διὰ πηδῶν* per poros parietum tenuiorum sensim transfudat, nunc vero acrior reddita atque vasa corro-

dens



dens vel ob infarctum rumpens per *διαίρεσιν* confertim effluit, & per consequens inevitabilem in cavitate aliqua collectionem inducit. Quod vero frequentior talis in abdominis cavo extravasatio fiat, rationes fere sequentes in causa sunt (1) in ventre infimo vasa lymphatica magis quam in alio luxuriant (2) motus diaphragmatis & musculorum abdominis reciprocus & contentis impressus vasa lymphatica continuo comprimit atque liquorem ibi contentum, qui viscidus est, in arctum cogit (3) ob pinguedinem in hoc ventre copiosam motus lymphæ paulo tardior, quam alibi esse solet, præprimis quia (4) notabilis ejus portio ab extremitatibus inferioribus refluit, adeoque majore cum difficultate movetur, præprimis si illæ, uti plerumque fit, tumore œdematoso obsessæ simul sunt.

§. XXIII.

Quibus annotatis pauca quædam, quæ ad scopum nostrum faciunt, de prognosi affectus, de quo agimus, dicemus. Est itaque hydrops morbus periculosus & periculosissimus, uti HIPPOCRATES *de intern. Affect.* l. 27. docet, & si in omni illius specie prognosis à consideratione causarum & remotæ & proximæ, itemque constitutione viscerum abdominis, tempore durationis aliarumque circumstantiarum conditione desumenda, de nostro affectu non adeo fausta esse potest. Aliis enim morbis qui successit, difficulter aut nunquam curabilis est, & quo graviores illi fuere, eo frequentius lethalis evadit, potissimum si infarctum & scirrhus viscerum v. g. hepatis, lienis, mesenterii & pancreatis insequitur, vel si cum cachexia corruptum humorum statum indicante complicatur, vel si hæctica constitutio concurrit. Quo magis igitur cum aliis morbis affectus noster complicatus est, eo minus eum felici prælagii esse puto. Enimvero organorum depravationem in integrum restituere negotium est difficultatis plenissimum, & si eventum consideres, plerumque illum infelicem videbis, præpri-



mis si à κακοσπλαγχνία est, nunquam faustus & lætus erit; pariter febris continua & lenta, infarctum viscerum necessario insequens, & pulsus durus, frequens, celer, & serratus nihil boni portendunt. Porro in angusto spes est, si tussis sicca, juxta HIPPOCRATEM S. VI. *aph.* 35. & VII. *aph.* 47. semper periculosa, respirandi difficultas indeque suffocationis periculum, tumor & dolor hypochondrii ipsi superveniunt. Idem periculum minatur, si originem à nimis hæmorrhagiis duxit, quia corpus inde debilitatur, sanguis vapidus fit & spiritibus depauperatur, vasa & reliquæ partes solidæ atonia laborant. Et si levior etiam affectus in corpore à prægressis morbis debilitato majoris considerationis est, periculum nostri non obscure patet. HIPPOCR. prognost. l. 7. Mali etiam ominis pronuntiatur eventus, qui à suppressis evacuationibus & retropulsis excretionibus est, quia quo magis illæ assuetæ sunt & in morbis supprimuntur, eo deteriores effectus proferunt, aut restitutis hisce spem curationis haurire possumus, plerumque vero in delicatioribus subjectis labem in viscere quodam relinquunt. Miserrimum imo incurabilem statum inducit hydrops è vasorum lymphaticorum ruptura ortus, quia nulla spes illa rursus coalescere superest. Et quæ sunt alia periculum hujus mali præsagientia. Interim notandum, quod non semper eventus sit infelicitis noster morbus, uti ex plurimis constat observationibus. Sic si hydrops ætati vegetæ, & subjecto robusto contigerit, sique porro non inveteratus, sed recens est, & ubi appetitus nondum dejectus, ac denique ubi ευσπλαγχνία præsto est, curatio speranda. Unde HIPPOCRATES *Prænot. Coac. Text.* 275. eos, qui in hydrope servari volunt ευσπλαγχνους esse debere affirmat. Hinc si ab humorem vitio magis, quam partium solidarum seu organorum est, facilius restituitur ægrotus, verum & hæc restitutio res est laboriosa, difficultatum plena & quæ multum temporis requirit. Insuper etiam curam admittit interdum hydropisia



febres male curatas excipiens, præsertim in robustis & regeta ætate constitutis. Ex quartana vero febre profluens, gravior & sæpius lethalis est, nisi febris revocetur. Urina si fluit, morbo nondum confirmato, ægrum inde levatum observarunt, verum si nimis copiosa effluit & viribus jam solutis contingit, hæc excretio mortis nuntia esse solet. Quod idem evenit, si urina flammea, lixiviosa, turbida, & spissa est, quoniam viscerum infarctum indicat, & quo magis à statu naturali illa recedit, eo minor eluctandi spes superest.

#### §. XXIV.

Ultimo loco de cura nostri affectus quædam subungere instituti ratio postulat, in qua tractanda quidem non ita versabimur, ut generalem exhibeamus, quin potius eandem ad varios, è quibus pronatus fuit, morbos restringamus. Indicationes alias à Rerum Practicarum Scriptoribus sequentes inculcantur, ut (1) dyscrasia humorum lenta & viscida incidentibus, solventibus, attenuantibus & diluentibus corrigatur, non minus ejus acrimonia, si quæ concurrit, absorbentibus temperetur (2) Causa continens seu extravasatus humor atque præter ordinarias naturæ leges in cavitate stagnans per vias convenientes eliminetur laxantibus hydragogis, diaphoreticis sed caute, atque diureticis, à quibus ultimis multum auxilii expectant. (3) Viscerum infarctus, quantum in artis potestate est, aperientibus, hepaticis atque spleneticis tollatur, denique (4) tonus partium labefactatus tonicis, roborantibus, junctis salinis, stomachicis item & condimentis moderate acribus & aromaticis roboretur atque restituatur Quæ indicationes ad medicationem felicem instituendam sollicitè observandæ utique sunt & optandum esset, ut ex voto & Medici & ægri frequentius adimpleri possent. Verum plures pro dolor!



cimus, utriusque spem haud raro fallere experientia satis frequens testatur. Quæ indicationes utut bene se habeant, in præsentî negotio nostro morbos prægressos potissimum attendendos, curam eo quovis modo dirigendam, & hydropem pro indole eorum affectuum p. n. quibus successit, aut quibuscum complicatur tractandum esse censemus, juncta generali & ab omnibus tradita methodo. Morbo quippe primario juxta artis præcepta sanato, secundarius vel sponte cedit, vel appropriatis remediis facile profligatur. Duplex alias methodus præscribitur curatoria atque præservatoria. Per hanc hic non intelligimus eam, quæ à morbi recurso seu recidiva præservat, sed quæ præcavet, ne iste unquam eveniat. Valet namque hic illud: satius esse morbum futurum præcavere, quam præsentem curare velle. Id quod Medicus obtinebit, si vel hæmorrhagias, vel febres, vel excretiones earumque suppressiones prudente methodo tractet, atque omni ope eo annitatur, ne perversa cura adhibita, aut debito regimine neglecto gravis hic affectus iisdem superveniat. Quam ob causam omni modo sibi caveat, ne in universum hæmorrhagias etiã justo diutius & nimia in copia fluentes, maxime activas (quod de passivis non æque valet) adstringentibus positive talibus, iisque fortioribus cohibeat, orgasmum sanguinis, qui nunquam non præsto est, temperantibus, prætermisiss aut non præmissis, evacuationem nimiam V. S. derivatoria, vel si opus est, revulsoria compescat, post moderata cohibentia & tonica refractis, sed repetitis dosibus adhibeat. Quod si vero ab enormi ejusmodi effluxu productum jam est malum, duo potissimum agenda esse judicio, nempe analeptics & nutrientibus sanguinis jacturam refarcire, spiritibusque depauperatum refocillare, dein vasorum collapsorum & atonia laborantium tonum martialibus, balsamico-tonicis aliisque appropriatis restituere. Quare indicatio vitalis hoc in casu quam maxime locum habet. Quibus ea, quæ in hydrope alias commendari solent jungenda & interpolanda maxime sunt. Ubi vero



vero modo memoratarum evacuationum suppressiones in causa sunt. omni cura studendum, ut illæ convenientibus emediis revocentur atque in ordinem redigantur; quæ media pro fluxus indole atque differentia discrepant, quo obtento fonticum hoc malum averti, aut si illud jam affligit, hoc probe observato felicius profligari poterit. Nimirum ad mensium & lochiorum fluxum restituendum emenagoga, ad hæmorrhoides revocandas hirudines in usum vocandæ sunt. Si aliæ excretiones sponte cessarunt, aut retropulsæ sunt, & hæ restituantur, scilicet scabies atque fudor lenibus diaphoreticis aliisque humores ad cutim invitantibus, diarrhœa lenibus laxantibus, ulcera & fonticulos si ad fluxum revocare è re esse non videtur, vicariæ evacuationes pro re nata instituantur, id quod de omnibus aliis excretionibus antea assuetis, jam autem emanantibus valet, si nempe earum successus vel nimius est, vel incongruus, vel aliorum incommodorum causa, vel etiam arte obtineri nequit. Non minus idem præoccupat recta febres curandi methodus, qua materia febrilis rite præparanda & præparata sufficienter evacuanda est, ita metus nullus erit hydropem iis successurum esse. Quod si vero hoc neglectum & ad sistentia nimis cito properatum fuerit, atque tumor asciticus vel feбри adhuc subsistenti accesserit, vel jam profligatæ supervenerit, laxantibus aliquoties præscriptis & assumtis febris revocanda, & si hæc redierit, circumspectiore modo curanda est. Id quod tempus non breve & patientiam tum Medici, tum ægroti postulat, minus tamen arduum est febrim quam hydropem debellare. Quæ evacuantia ex hydragogis composita & cum aperientibus atque incidentibus maritata in forma noduli aut vini medicati hunc in finem præscribantur. Lenia vero illa sint, ut cum epicrasi operentur, non fortiora, non drastica, à quibus levamen quandoque sentit æger, sed parum durabile, uti WILLIAMS *Tr. de hydrop.* monet, & iudicio TRALLIANI *Med. Libr. 9. C. 2.* satius est paulatim & tato evacuare, quam festinando una cum morbo ægrum è medio tollere. Insuper experientia teste ab ejusmodi fortioribus assumtis & viscerum infarctus augetur, & asciticorum abdomen haud raro magis intumescit, siquidem una cum aliis humoribus serum vehementius ab iis commotum magis effluit, unde cataclysmus hic microcosmicus invalescit. Et si dicendum quod res est, parum sæpe solatii etiam à mitioribus expectandum, quod ipsum FRID. HOFFMANNVS *diff. de hydrop. Pericard §. 22.* docet. Interim tamen in malo nondum inveterato exoptatum edunt effectum, serum evacuant & per consequens abdominis tumorem immnuunt; quamvis conceptu difficile sit, qua ratione aquæ extra vasa & circulationis leges constitutæ, vel intra eadem reabsorberi, vel saltem ad intestina delabi possint, nisi per poros parietum eas transudare statuamus.



mus. Quo etiam facto non nisi tenuior portio transibit crassiore in abdominis cavitate relicta. Præ alio vero hydropis genere crucem medico figit ille, qui cum febre quartana complicatur, aut eidem supervenit, quod si enim alteruter horum affectuum solus & ab altero disjunctus scandalum est, alterum concomitans aut consequens duplex non inepte vocatur, & patientiam medici pariter ac ægri non parum fatigat. Quare digestiva & incidentia, nec non pilulæ balsamicæ diu continuandæ sunt, aliis quæ ad hunc scopum faciunt, non neglectis. Quod si vero è signis non incertis compertum fuerit, labem aut infarctum vel in hepate, vel in alio quodam viscere relictum affectus nostri causam esse, tunc aperientibus & resolventibus, junctis simul diureticis quam maxime insistendum, eum in finem, ut viæ obstructæ referentur. Uti etiam si lentor & spissitudo humorum præprimis lymphæ, nec non cachexia universalis concurrit, incidentia, præparantia atque attenuantia, si etiam dyscrasia adest scorbutica, antiscorbutica iisdem debite maritanda sunt; quamdiu enim hæc vitia tum solidorum tum fluidorum non corriguntur, hydropem curare velle nihil aliud esset, quam æthiopem lavare. Hisce interpolanda sunt reiteratis vicibus per alvum evacuantia, ut id, quod resolutum est, è corpore ejiciatur; neque prætermittenda hic quoque sunt diuretica, in quibus unica fere spes collocatur, magis si suppressiones humorum serosorum malo occasionem præbuerunt aut illud fovent. Quibus illud quandoque curatur, si urinæ citrinæ sunt, quod si vero crassæ atque lixiviosæ fuerint, frustraneus ut plurimum labor ab horum usu est. De vomitoriis, utpote quæ non nisi in principio morbi & ubi vitiosa in primis viis saburra hæret, locum habent uti etiam de scarificationibus crurum aut vesicatoriis, quæ adhibita gangrænam atque mortem accelerant, nihil addimus. Quid de V. S. nobis videatur, è §. 11. satis intelligitur. Parum quoque præsidii est in paracentesi abdominis infido illo remedio, quia effectum morbi non vero causam tollit, & teste CELSO L. 3. C. 21. *emissus humor non sanat, sed tantum medicina locum facit.* In aliquibus sed paucis numero felici cum successu, in plerisque vero irritato conatu instituitur, ob rationem à NICOL. PFCHLINO L. 1. Obs. 62. datam, quia in ultimam plerumque necessitatem rejicitur corrupto viscerum statu jam præsentem. Neque paginarum angustia permittit, ut quippiam de diætâ adjiciamus, nisi unicum hoc, ut æger parum bibat, sitimque, si quæ adest, quibusvis aliis mediis quam potu ingesto fallat. Quem in finem aliqui globulos plumbeos è gelida aqua modo desumptos in ore continuo detinent. Ut tacëam, quosdam abstinencia ab omni potu sanatos ab hydrope legi vid. ZACVT. LVSIT. *Prax. admir.* L. 2. Obs. 60. BENNIVEN. *de appet. sanat. & morb. caus.* C. 13. Horum ut & aliorum remediorum prudente & subordinato, nec non diu continuato usu dirum hunc affectum aut præcaveri, aut si corpus jam occupaverit & penitus tolli nequeat, saltem ejus sævitiam leniri posse confidimus.